

Zaman baru dalam industri negara: Dr M

12 MAY 1981

GENTING HIGHLANDS, Isnin—Penyusunan semula ekonomi dunia memerlukan negara-negara sedang membangun seperti Malaysia memberi perhatian lebih berat kepada industri berasaskan sumber.

Penubuhan Perbadanan Industri Berat dan penumpuan kepada industri berasaskan sumber ini, kata Timbalan Perdana Menteri, Datuk Seri Dr. Mahathir Mohamad hari ini, merupakan satu era baru dalam usaha perindustrian negara ini.

Katanya, bagi menentukan ekonomi negara akan berkembang pesat, salah satu strategi pembangunan negara ialah dengan meningkatkan

daya pengeluaran perindustrian.

Untuk mencapai matlamat strategi ini, tambahnya, pelaburan dan eksport perlu terus berkembang dengan kadar yang pesat sementara strategi galakan eksport dan gantian import perlu diperhebatkan.

Inflasi

Datuk Seri Dr. Mahathir berkata demikian semasa berucap merasmikan Seminar Kebangsaan Latihan Perindustrian anjuran Lembaga Latihan Perindustrian dan Persijilan Ketukangan Kebangsaan, (LLPPKK), Kementerian Buruh dan Tenaga Rakyat di sini pagi tadi.

Katanya, langkah

seumpama itu perlu disusun memandangkan suasana ekonomi antarabangsa dalam tahun 80-an dijangka menghadapi kadar pertumbuhan yang rendah.

Di samping itu, katanya, negara-negara perindustrian akan terus mengalami keadaan inflasi berterusan, kenaikan kadar pengangguran, kemerosotan perdagangan antarabangsa dan kurang imbangan pembayaran yang semakin bertambah.

"Pertubuhan Pembangunan dan Kerjasama Ekonomi (OECD) meramalkan kegiatan ekonomi negara-negara perindustrian dijangka akan berkembang sederhana selepas tahun 1983," katanya.

Kelembapan pertumbuhan ekonomi ini, katanya, akan menyebabkan negara-negara perindustrian ini lebih cenderung mengamalkan sikap menyekat import barangan dari negara-negara yang membangun yang bersaing dengan keluaran negara mereka.

Kesan buruk

"Sikap perlindungan negara-negara perindustrian ini akan mengakibatkan kesan buruk ke atas strategi mengeksport negara sedang membangun termasuk Malaysia," katanya.

Bagaimanapun, Timbalan Perdana Menteri menambah, suasana ekonomi dunia yang kurang baik ini sebenarnya memberi peluang kepada negara-negara sedang membangun memupuk industri-industri mereka mempunyai kelebihan perbandingan.